

摘藻堂四庫全書薈要

集部

欽定四庫全書薈要卷二萬五百十八

集部

明詩綜卷四十五

翰林院檢討朱彝尊編

龔用卿

二首

用卿字鳴治懷安人嘉靖丙戌賜進士第一除
修撰歷諭德終南京國子監祭酒有雲岡集
武厓第五曲謁紫陽精舍

九曲清溪流此地適居半上有丹屏圍下有綠波渙嘉

木雜異草神工留奇觀山川洩幽靈晦明定昏旦茂園
小可耕淺渠清可灌我來謁紫陽維舟楊柳岸懷賢式
居廬訪舊窮考按釣游本夙心歷覽騁披翫玄理固予
會奈此浮名絆行當息塵網永作青山伴

冬日飲九山員外怡薰樓

開軒對南山蒼翠日在眼山色佳有餘引領意無限煙
霏起暮容浮雲自舒卷時見登山人歷歷諒非遠層樓
具盤餐主人興不淺清歌遶畫梁冥心栖絕巘玄理儻

予會幽懷從此遣

蘇

祐二首

祐字允吉一字舜澤濮州人嘉靖丙戌進士除
吳縣知縣再知東鹿徵授監察御史出為江西
提學副使遷山西叅政陞大理少卿以僉都御
史撫保定以副都御史撫山西入為刑部侍郎
尋以兵部左侍郎總督宣大進兵部尚書削籍

尋復官有穀原詩集

朱中立云穀原所作格不高而氣逸調不古而情真

穆敬甫云公意興甚高得句不苦自是盛唐遺韻于無垢云蘇公詩道麗典雅卓然名家陳卧子云司馬詩沉雄雅練邊塞之篇不媿橫梁七律格律精嚴聲調清亮咄咄逸羣而上

聞警

榆塞傳刁斗經年未罷兵
遂令青海箭復度白登城
四野空多壘三軍孰請纓
轅門有頗牧萬一早留情

子歸入倒馬關作

南風吹雨傍關來
關上千峰畫角哀
老去尚憐金甲在
生還重見玉門開
鵠絃謾引思歸調
虎節空慚上將才

聖旨恩深何以報車前部曲重徘徊

張 鏊 一首

鏊字濟甫南昌人嘉靖丙戌進士改庶吉士累
官南京兵部尚書有遷鶯館集

訪趙元戎築塞

走馬黃龍府觀兵細柳營連山邊雨合平野陣雲橫松
漠懸秦壁燕支動漢旌猶憐趙充國辛苦築金城

陸 垹 五首

邛字秀卿嘉善人嘉靖丙戌進士累官右僉都

御史巡撫河南有簞山集

李元實云簞齊詩文發乎中情根之理道

無高論無詭詞淡然如菽粟之味可嗜而不可

厭陸子餘云簞山言志為詩固非真響處華

腴而不詡當阻阨而不挫敘

逸豫而不淫宣伊鬱而不激

靜志居詩話嘉靖初吾鄉詩人漸山而外有簞山

簞山漸山集選家恒多采錄兩公詩或見遺譬諸

園繪漸山丹青兩公水墨鑒賞

者好有不同非畫品有高下爾

感述

行人牽牛去乃謂邑之人無妄固有疾勿藥戒諄諄所

以君子徒兢兢慎厥身明期無人非幽欲無鬼嗔不虞
譽方恥求全毀非真浮雲翳白日白日豈終淪

築堤謠

彼田高我田低高田積土河成蹊低田年年催築堤築
堤復取田中泥去年大水百穀傷高田得熟低田荒今
年土龍雨莫禱高鄉之田為茂艸

宿三义口

雲樹蒼茫合鄉關道路賒近船呼伴侶隔岸有人家艸

短煙橫野江寒月侵沙家人應念我今夜宿三义

郡廨似野齋

青林依郡宅渾似野人居幸此無公事閒來展道書蟬
聲來遠樹艸色上前除莫笑耽玄寂功名意本疎

弋陽道中

石子船頭磊磊溪聲枕上潺潺人行上瀨下瀨夢隔千
山萬山

張子立 一首

子立字原禮黃縣人嘉靖丙戌進士除行人擢
湖廣道御史歷官右僉都御史巡撫延綏謫戍
寧武關

龍沙北望接三關十萬旌干虎豹閑隘地風煙臨晉水
連營烽火動燕山行邊將帥勞推轂勝算朝廷重轉圜
黠寇早聞驅馬去將軍新自射熊還

呂希周 二首

希周字師旦崇德人嘉靖丙戌進士歷官通政

司使有東匯詩集

詩話東匯於詩亦沾沾自喜其集不甚傳由其子請論定於陸武惠也同里曹秋嶽侍郎博徵文獻集明三百年名公卿手書墨蹟裝潢成冊多至七百家東匯雜詩在焉此集中所載者較勝亟錄之侍郎歿後古林書畫散作雲煙曩之過眼者不復再覩矣可惜哉

雜詩

人生如萍藻汎汎浮江河東西逐流風南北信逝波波
逝一以散風迴復來過暖翠唼鳬鴨遙青逼蒲荷託身
一水中漂轉諒靡他深谷忽為陵天運其如何枯瘁同

百草無復黃白華植根本無定浮榮安足多

萍鄉次趙都諫漸齋

晚憩萍鄉館繁陰度短牆鳥栖人亦倦山僻雨初荒
新月憐游子涼雲夢艸堂好風三百里吹我上瀟湘

華察十一首

察字子潛無錫人嘉靖丙戌進士選庶吉士改
戶部主事歷兵部郎中再改翰林修撰遷侍讀

學士掌南院有巖居橐

黃才伯云鴻山詩追蹤
陶杜卓然大雅王僅

初云學士詩宣意冲淡調出天成語皆心得 王道
思云子潛詩灑然自立於塵壒情累之表意象之
超越音韻之淒清不受垢氛而獨契冥滓 王
元美云華子潛如磐石疎林清溪短棹雖在秋
冬之際不廢楓橘 龔鳴治云韓子云和平之
音淡薄愁思之音窈渺鴻山捺和平之音而得
窈渺之趣可謂兼才 宗子相云學士詩雅淡
有靖節風 蔣仲舒云學士刊洗浮靡獨秀本
色誠陶韋之妙境也惜才具稍乏短於七言
袁魯望云先生詩根乎性真妙乎言理冲粹清
英不可境象 李本寧云學士五言有陶韋之
致 鄭平子云鴻山幽情秀句不減王孟 陳
卧子云子潛清儉似茅茨下人 李
舒章云子潛如坐禪空山微聞鐘磬
詩話學士豐於貲纖纖務畵晝夜持
籌不知吟咏性情何由超詣乃爾

游善卷碧仙巖

落日下空門，齋鐘出林莽。
偶茲叩精廬，再宿翠微上。
舊游不知處，但見松杉長。
巖虛露氣清，坐覺心魂爽。
月白山窗高，夜靜風泉響。
遂令寤寐中，超然脫塵網。
雲壑永棲遲，願言稅歸鞅。

夏日山中述懷

晚來慕恬曠，適意在罷官。
取涼喬林下，晝日恒不冠。
白雲滿前峰，曳杖行獨看。
有時遇鄰叟，烹茶共邀歡。
山田

固云薄歲入亦自寬達人貴知足吾生永相安

僅初移家湖上有作和韻贈之

城邑豈不美生事在田廬移家就所安正當長夏初壟
上刈舊麥園中灌新蔬寧卹四體勤將期方寸舒入門
謝鄰里幸託仁者居湖光近林牖水月澹清虛因適魚
鳥性遂於塵跡疎開軒聊種竹閉戶兼著書豈羨衣食
饒但喜歲月儲達人能固窮朝夕恒晏如願言日相過
多聞時起予

五月望夜與諸君山中再酌和僅初韻

仲夏苦晝永薰風起將夕圓景海上來照此山中客坐
令微暑消兼使衆累釋興至時命觴露下復移席因耽
水竹居遂同魚鳥跡盤遊豈忘返翫物聊取適臺空人
影疎夜靜潭氣白叅差樹杪峰歷歷辨咫尺超然悟真
境萬物一虛寂

晚至湖上和僅初韻

山中讀書罷來憩澄湖濱綠陰暗溪路草堂靜無塵平

生滄洲意煙波夢垂綸石梁度落景花渚藏餘春閒情
狎魚鳥悠然適吾真雲天澹晴霽空水明衣巾未遂乘
桴願徒懷江海人

宿玉陽山房和僅初韻

返照明溪梁深松晦夕景岩卧符夙期雲陰石牀冷因
投物外心遂入清虛境天寒木葉疎月落山房靜然燈
獨不寐秋宵一何永明發從此辭白雲鎖蒼嶺

秋日觀稼樓曉望

日出天氣清山中悵幽獨登高一眺望風物淒以肅流水映郊扉炊煙散林屋秋原一何曠薄陰翳叢竹時聞鳥雀喧因念禾黍熟悠悠沮溺心千載猶在目

秋晚過英姪園居

野曠秋氣高丹楓映茆屋農家各欣欣門外山田熟相邀具雞黍悠然入深竹風物日蕭疎但見籬畔菊賞心愜所期勝事良已足落景照湖光孤亭暝巖麓

寄蔣子雲

我家大江南君家大江北平生弄篇章白首不相識
曩聞大雅音因窺作者閩一從罷官歸壘上親稼穡口誦
南華經意象欣自得有時江月來照見天地色神交入
夢寐道遠安可即雁去為寄書殷勤問眠食

秋日施子羽姚山人見過

掃徑秋色佳衡門遲來客山厨薦園蔬戀賞淹日夕荒
臺蔭叢桂徙倚對巖壁夜靜人意閒潭空月華白信宿
愜所期去住欣自適養生慕彭聃學道窺莊易願言保

微尚歲晚成三益

僅初以詩見寄次韻答贈

地僻畏風雨入春長掩扉一從還山後又見梨花飛世
事多貝錦故人猶布衣瑤琴勿輕奏山水知音稀

屠應竣

七首

應竣字文升平湖人嘉靖丙戌進士選庶吉士
改刑部主事調禮部歷員外郎中仍改翰林修
撰陞侍讀進春坊右諭德有蘭暉堂集

俞汝成
云漸山

詩明爽俊偉 穆敬甫云屠詩深重不浮得唐人應制體 陳卧子云屠公典麗流暢亦足名

家 李舒章云文升風姿閒麗如玉樹風前是戶庭佳物

詩話諭德取材六代具體初唐爛若春葩將以秋實是衆作之有滋味者

贈袁子永之戍湖州

弱齡事篇翰與子諧所歡同芳握蘭茝偶德璵與璠彈冠入鼎門振衣陟華軒皇心苟予顧白首諒無愆風波起中道行路一何難子行戍故越予留滯幽燕孤雲易流邁獨波不成瀾艱危各異勢縶縶何由宣贈子別鵠

操報我以孤鸞

贈內

良時飭徒御予當遠行游上堂戀慈親入室語好逑王
臣奉時役不得顧晨羞攜手再三歎出門悵悠悠室中
四五雛眷眷何能留遠期在終歲忽徃增離憂離憂安
可任迢迢隔辰參徙徙雙鯉魚一浮而一沉楚橘不北
徙越禽有南音贈子明明鏡可以鑒我心

馬上贈武舉生金寶

有序

金寶以歲庚辰舉武試時學士石公珪為考官
今廿年餘矣猶以敝衣走風塵中兵憲陳君令
護予行予憫之為賦長句

翩翩飛騎突且雄
橐垂七尺高麗弓
向予長跪馳素封
來自天津陳長公
感君來緘重君使
汝才且雄者誰子
云是熊峰門下士
緋衣已隨塵土緇
壯心尚逐風雲起
長公好士輕黃金
求才不憚幽與深
幕下立談收劇孟
坐中飛檄佇陳琳
白髮自知無長物
清商猶自有哀音

我聞其言感且歎古來相士輕貧賤驂騑豈少伯樂無
世上紛紛寧足羨曾冰皚皚黃河枯策勲報恩真丈夫
插貂橫玉盈上都封侯之骨汝有無贈汝腰間金僕姑
贈同年謝子儒致仕歸蜀

子真棲谷口潘岳賦閒居長揖辭明主為農返故廬雪
消巴嶺出天入錦江虛莫待揚雄老潛夫早著書

趙武庫元實移居賦得堂字

高士便疎曠居臨御苑傍開尊秋月滿列樹夏雲涼水

鏡搖朱戶風琴奏石房登樓新有賦王粲謝升堂

漫興

南風吹晝沙霧黃遠在燕臺思故鄉火雲炎日暑三伏
江檻野亭天一方即愁蠅聲惱饒睡況有客子來相妨
行歌抵暮遲明月柏林露葉鱗鱗光

鏡光閣雨

鏡光閣在帝城邊遙控西山奠北川忽有風雲來絕塞
坐看雷雨下諸天微茫野色俱堪畫潏沔中流好放船

東下林塘更幽絕江南秋望此依然

王格一首

格字汝化京山人嘉靖丙戌進士選庶吉士出
知永新縣陞刑部主事調戶部歷員外郎中出
為河南僉事會南巡行宮火逮獄削籍久之授

太僕寺少卿有少泉集

顧華玉云少泉取材于選効法于唐諸體皆工

詩話少泉矢口信筆不費推敲合作者寡并非
洞庭漁人之比南風自此繼夢澤而代興者鮮
矣

燈夜曲

千金一刻此芳春
況復天邊月色新
曲巷小橋隨意去
明燈何處不留人

陸粲

八首

粲字子餘一字浚明長洲人嘉靖丙戌進士選
庶吉士改授工科給事中坐劾張桂謫都勻驛
丞遷永新知縣有貞山橐

顧玄言云給事與屠
文升表永之王汝化

同時入館並有盛名
亦李唐四傑之流

詩話嘉靖間元老類皆延攬賓客雖貴谿分宜亦然惟張桂專與文士為讐丙戌庶常一筆盡掃貞山又多論劾困抑終身然晚極田廬文酒之樂菽園著述傳誦藝林比之二柄臣孰得孰失邪

擔夫謠

擔夫來擔夫來爾何為者軍當差朝廷養軍為殺賊遣作擔夫誰愛惜自從少小被編差垂老奔走何曾息祇今丁壯逃亡盡數十殘兵渾瘦黑可憐風雨霜雪時凍餓龍鍾強驅逼手搏麥屑淘水餐頭面垢膩懸蟣蟲高

山大嶺坡百盤衣破肩穿足無力三步回頭五步愁密
箐深林多虎跡歸來息足未下坡郵亭又報官員過朝
亦官員過暮亦官員過貴州都來手掌地焉用官員如
許多太平不肯恤戰士一旦緩急將奈何噫吁噫一旦
緩急將奈何

贈別王直夫 二首

商飈激疎牖蟋蟀鳴牆陰志士恒感秋況乃違所欽之
子役王事遠適閩江潯攬衣起追送渺彼川塗深少小

從子遊方軌馳文林時去志願違素髮忽滿簪撫景慨
今昔惻愴情難任願言顧離索惠我瓊瑤音

威鳳天際翔潛虬澤中蟠嚴子時閉肆貢公乃彈冠顯
晦豈必同各以性所安子行樹遠績奮身青雲端鄙人
棲蓬藿蹇拙聊自完丈夫志千載飛沉何足歎相期保
貞素歲晚同金蘭

憶家君

白髮人千里朱門月半扉燕山雲去遠澤國雁來稀無

夜不成夢有書空道歸遙憐北風勁尋便寄寒衣

林若撫云

先生七
歲時作

寄葛太守子中

憶爾投荒日依依戀翠華亦知行萬里不是為丹砂郡
古留銅狄堂深繡土花何須憂瘴癘只合卧煙霞

送陳太僕謫教海陽

蠻中千嶂啼猿裏海畔孤城匹馬過却望瀧江更南下
月明雙淚聽蠻歌

送人入蜀

樓船捩柁浪花生
百丈雙牽黛色明
夾岸兒童齊笑語
嘉陵江似使君清

送汪僉事之湖南

驄馬長鳴飲碧流
銀鞍金絡紫茸鞦
一作花銀鏤帶鵲鵲裘
行人

大別山頭望雲外
雙旌指鄂州

石文睿一首

文睿字文思
台州寧海人
嘉靖丙戌進士
除太

常博士有白山集

詩話文思詩未成家然如寒生紅葉雨秋老白
蘋江高塔靜觀塵土界老僧閒數廢興年正是
俗不

郊行和韻

雲散峰晴海角樵聲牧唱山根客喚潮來石渡鳥翻花
落蓬門

江以達

一首

以達字于順貴溪人嘉靖丙戌進士授刑部主

事歷郎中出為福建僉事轉湖廣提學副使有

午坡集

詩話午坡以北地文出廬陵眉山之上又謂昌黎詩不逮文尚沿習氣胥臺贈詩云賦窺宋賈室詩登潘陸堂不免阿其所好矣

夏日偕東沙赴練塘北園之遊

佳辰愜行遊以我心所賢來登山上亭共聽風中泉因坡展瑤席坐石藉芳荃蟬鳴高樹林涼葉墮我前脫巾謝塵鞅箕踞臻忘年緬彼域外觀息此區中緣

聞人銓 一首

銓字邦正餘姚人嘉靖丙戌進士除寶應知
縣擢山西道御史巡視兩關歷湖廣按察副使
有芷蘭集

詩話邦正著錄陽明之門撰飲射圖解又雕劉
昫舊唐書行世津津好古不易得也句如花落
雨餘雨風吹寒
食寒情味不淺

登北固山

郭外青山好高峰俯碧霞江聲入尊筇秋色滿汀沙島

嶼金焦並人煙市井賒地偏鷗鷺狎擬宿梵王家

田汝成 五首

汝成字叔禾錢塘人嘉靖丙戌進士授南京刑部主事繇員外轉禮部郎中出為廣東提學僉事左遷滁州知州陞貴州僉事遷廣西左叅議

有豫陽集

顧玄言云學憲詩沉鬱豪縱如探珠合浦夜光迫人徃徃眩目

詩話叔禾挾黃勉之徧游武林諸山互相酬和撰西湖遊覽志及志餘有稱好事惜中興館閣錄都城紀勝武林舊事夢梁錄咸淳臨安志大滌洞天紀諸書皆未寓目未免挂一漏十耳詩

品在范菁山

江午坡間

自石屋洞至法相寺同黃勉之

曠志憶逍遙勞歌厭囚窘縱壑媚春鱗薄霄媿秋隼厭
彼方內遊夙此塵外軫每挹山水輝都使名利盡煙樹
杳芊綿雲峰互虧隱崖屋已靜便祇園復恬引金輪相
自圓玉鏡光猶蘊沉照燭靈根依方護玄準理會得有
充神開暢無朕雖牽纓組心亦免立壑哂

軍中酬焦學憲過予思南別署有懷見寄

誰道軍中樂徒勞物外吟朔風淒淒鼓角嘉節罷登臨艸
閣依山迥江梅映雪深無由款高駕愁絕暮雲心

烏蠻灘

一葉中流下千山兩岸開鼉鼉吹浪轉燕雀受風迴巨
石迎船出啼猿近客哀從來輕險絕涉此寸心摧

龍江送吳士美移守釣州

蘆荻蕭蕭鴻雁飛清江石郭重因依孤舟尚憶他年別
萬死還從去路歸白首丹心憐汝在窮途青眼故人稀

量移猶是長沙謫落日哀歌事轉非

韶州

河戍寒依浦村氓晝掩關隔山明野燒云是小溪蠻

樊

鵬 六首

鵬字少南信陽人嘉靖丙戌進士歷官陝西按

察僉事有樊氏集

詩話望之少南同為仲默鄉井絮短論長少南差勝

楊白花

楊白花一夜風吹去知他飛飛落何處金屋重重閉不
開哀鴉啼盡宮中樹

於郎中足賦卷

官軍日食十萬粟邊城財賦苦不足大同宣府鄰封疆
千里極目皆沙場朝廷北顧垂至計馬飢軍餓憂不細
於君自出居庸關芻糧堆積高如山官軍無事日牛酒
偵騎聞之皆北走

寄袁雙溪

聞汝行塵在南陽定汝陽古城遙落日岐路滿秋霜鴈
影江流隔猿聲楚澤長賈生官不達莫怨漢文皇

六合

聯轡來東邑朝來暮復還市廛通亂水城郭帶秋山路
出青楓外江流白霧間西行鄉思切愁絕望昭關

五丈原

英雄久已矣霸跡至今存為惜三分國愁看五丈原春
雲浮戰壘野柳暗營門潐潐金牛道誰招萬里魂

賢隱寺宴別張子言限字

寺門縹緲立孤雲
雲裏鐘聲落澗聞
白晝蛟龍時並見
青山麋鹿晚為羣
窗中碧霧千峰濕
樹杪香泉百道分
明發長安萬餘里
落花尊酒暫留君

袁 袞 十九首

袞字永之吳縣人嘉靖丙戌進士選庶吉士改授刑部主事調兵部坐失火下詔獄謫戍湖州用薦補南京兵部員外出為廣西提學僉事有

胥臺稟

文徵仲云永之樂府古律詩莫不合作
吳峻伯云永之古詩法魏晉近體擬

唐當其意到一騁數瞻沉核無所摹剽而動與
作者合度 王元美云袁永之如王謝門中貴

介子弟動止可觀 蔣仲舒云袁詩如

築城建邑位置整嚴終乏悠然之思

詩話永之詩品在后岡之上足與吾鄉漸山方
駕報顧東橋書云立言之道其難有六學難乎
淵該事難乎綜覈辭難乎雅健氣難乎沖和識
難乎貫融志難乎沉澹兼是六能而假以歲月
庶矣古之立言者率多中歲蓋少年輕俊間見
未廣計慮未周詞鋒則銳而論議剽捷終乖軌
轍今讀胥臺集多中歲之詩
宜其聲既清會辭亦藻拔也

移居峴山精舍

山寺閔精廬移居性所適寧知賓客稀漸與城市隔岡
巒何秀美蒼翠還日夕夏木密以陰幽鳥來几席開窗
見漁舟湖水清且碧焚香日晏坐遣興在篇籍余本迂
散人禪林亦靜僻茲焉遂吾好已矣思屏跡

題盧師陳所居五塢山房

吳邦表靈隩山水蘊清嘉緬惟南橫勝玄邃誠難誇飛
泉懸白雲疊巘棲頽霞連岡盡叢竹密塢多桃花信美
可以居僻性思移家君家南橫側搜討窮幽遐俯臨北

麓峻曲抱南湖斜丹房閔芝朮列墅羅桑麻既寡徵稅
憂兼無城市譁茲樂寧外獎珪組亦何加

觀魯德所貢獅子歌

魯德迢迢遠在崑崙西叩關通道貢狻猊絕漠知重幾
萬譯跋涉流沙經月氏初從羈縻就屬國傾城聚觀途
路塞攣題械脰苦維繫豹鞞為鞘鐵銜勒尾如流星氣
憑陵隅目燭地思奔騰四蹄蹴躡毛髮竦瘦脊碑兀排
鋒稜崩雷掣電望風吼青兕辟易元羆走嗇夫股栗不

敢前壯士變色將無狃奚奴綠髯深眼睛戟手魑髻垂
胡纓須臾鞚引藁街下俛首帖耳猶長鳴剗羊屠狗恣
所欲豐芻肥哉日不足英雄束縛亦如此豢養恩深敢
辭辱始知丹青貌不同彷彿山海圖經中上林已開射
熊館天子賜見長楊宮虎賁如雲兵衛列彊弩短刀防
噬嚙詔謂圉人破檻車玉階舞蹈龍顏悅我聞異物不
可馴袒裼擾之如有神水衡寶鏹勅頒賜不惜金錢懷
遠人嗚呼明王慎德卑遠略珍禽奇獸須教却周征白

狼荒服叛漢閉玉門歌頌作先朝故事傳敬皇魯德歟
塞曾來王當時謝却仰明聖萬古史冊生輝光今皇端
拱勤內治酋長款關惟嗜利何當破械縱山林厚賞金
繒絕來使

送陳少叅魯南之江西

金章荷聖恩辭出大明門驛路雲千里都亭酒一尊康
郎城邊春水發滕王閣上懸新月輕帆直下疾於飛幾
日看山遍吳越揚雄白首薦公車曾作詞臣侍石渠直

道自甘終放棄高才誰肯借吹噓
藩叅四品官不薄豫章猶勝長沙惡
簿書錢穀亦何勞十載功名至方岳
春來彭蠡鴈難聞江艸江花杳暮雲
南歸正及鱸魚美直北相思不見君

送陸子遊秦嶽

有客手珮蒼精龍告我遠遊登岱宗
岱宗根蟠九百里絕頂上有秦時封
金泥玉筭秘難見古文竒字誰能辨
日觀遙看碣石津雲峰正對蓬萊殿
海中鰲身應天黑

三山湧出神仙宅，貝闕參差結蜃樓。
珠宮掩映藏蛟室，君登泰嶽觀滄海。
九州四瀆皆安在，堂上遺音想絲竹。
壁間經傳尋魚亥，丈夫所志在蓬桑。
焉能局促籠中藏，看君一劍行萬里。
五嶽之遊自茲始。

大駕視牲南郊

大路調仙馭，朱旗列禁城。
帝牛三月繫，田燭九衢明。
日並龍旒出，山將綵旒迎。
橫汾卑漢詠，裡祀秉皇情。

人日齋居雪霽

瑞雪逢人日堯年感物華水從銀漢落山繞玉關斜帳
殿披晴靄郊宮閔綵霞今朝禁城望無樹不飛花

蒼梧作

氣候南荒異蒼梧濕更饒山雲晴忽雨江霧夜連朝病
與炎俱劇愁隨瘴不消故鄉那可望桂嶺已迢迢

憶橫塘別業

一卧文園病終朝念故山敢希宣室召祇望玉門還橘
想千頭足桑思十畝閒如何五斗米猶自滯南蠻

謁柳祠

羅池非昔日柳廟亦荒頽
秋艸重門閉寒花獨樹開
文章真命世今古孰憐才
猿鶴如相訴松風晚更哀

謁劉賢良祠

高樹臨流水空庭澹夕陽
萬言翻下第三黜竟投荒事
業存青史英靈儼白楊
古來稱屈者不獨一賢良

自柳至平樂書所見

鬱白方言似潯梧瘴氣賒
蚺蛇晴掛樹射蜮晝含沙
屋

覆湘君竹山紅蜀帝花夷堅收未盡博物待張華

招鶴

獨寫忽飛去冥冥滄海東離哉翻羽翼幸矣脫樊籠影
憶空庭月聲憐別院風凌霄自有志吾豈學支公

送陳德夫使魯

帝曰封同姓皇華送使臣河山藏漢誓寶玉展周親殿
說靈光古經傳孔壁新余生好文獻一為訪先民

送何給事善克守衡州

衡陽楚上流太守古諸侯五馬橫金去三湘露冕遊猿
聽巫峽夜鴈數洞庭秋今日辭青瑣還將諫艸留

秋興

仙仗行宮舊內居花間往往駐鸞輿徒聞漢帝橫汾曲
不見長卿諫獵書天子射蛟開水殿奚官牧馬遍郊墟
蒹葭苒苒秋無限悵望煙雲萬里餘

登匡廬山

宮宮廬嶽近天都萬丈丹梯鳥道孤樹裏泉聲飛瀑布

空中煙霧起香爐峰形下瞰蓮花嶺江勢遙吞彭蠡湖
白鹿仙巖何處是却看五老在虛無

采香涇新莊

誅茅閭闔城之西路轉采香涇上隄濃陰榆柳綠當戶
秀色芙蕖紅滿谿力田輸稅半栽秫鑿沼養魚兼灌畦
每媿長公高隱志杜門從此可幽棲

張摯字長公

西蘆辭

君家滄瀆城城西蘆子渡蘆子何蒼蒼秋風吹白露

范言四首

言字孔嘉秀水人嘉靖丙戌進士授蒲圻知縣
改保定儒學教授歷國子監丞陞大理府同知

有菁陽集四音存橐

湯義仍云菁陽質有其文
孤秀清瞻 陳仲醇云菁

陽詩文深往獨
至最合古法

詩話菁山先生不畏強禦為國子監丞時嚴世蕃著紅袴入上舍先生夏楚撻之分宜次日造門謝未幾而大理丞命下矣嘉靖初吾鄉稱詩必以先生為巨擘屠諭德漸山長歌云菁山先生真崛奇文章垂世光陸離懸黎結綠世莫識陽春白雪和者希是時漸山詩名籍甚顧入室

稱弟
子馬

駕出北郊

清蹕辭南陸玄宮禮北郊周廬屬霜戟行吹雜金

一作風

鏡齋祓陳周幣明裡薦楚茅還聞天樂在縹緲下雲旂
別華鴻山翰撰

細雨花邊路閒亭竹外扉地偏亭榭古春老燕鶯稀柳
色侵歌扇藤稍拂舞衣新愁忽高會知爾遠懷歸

寫樓別意

吹笛高樓月色新不知江上有離人柳條欲折可憐暮
梅花即開何處春孤舟泛泛剡溪雪落日迢迢揚子津
天涯我亦索居久為汝長歌一愴神

曉發吳江

垂虹橋邊曙色微三高祠下露華晞畫船打鼓出城去
秋水滿江鴻鴈飛

趙時春 二首

時春字景仁平涼人嘉靖丙戌進士選庶吉士

改兵部主事以建言下獄尋補翰林編修又以
上疏放歸會邊警起領民兵自副使超拜右僉
都御史巡撫山西有浚谷集

李伯華云浚
谷詩有秦聲

詩話景仁慨當以慷
如擊唾壺不必中節

送陶虞卿赴神機叅將

宋殿三衙帥唐環十六軍官聯叅斗柄旌旆儼星文羽
衛迎黃道龍光覲紫雲時時仙仗入清蹕早應聞

留滯

留滯滄洲已浹旬
鷗冠終日滿風塵
浮雲何事來還住
歲月無情秋復春
海甸中宵來驛使
天涯盡處未歸人
不堪對酒翻惆悵
翠篠黃花幾度新

王慎中

十七首

慎中字道思晉江人嘉靖丙戌進士除戶部主
事改禮部復改吏部歷員外郎中謫常州通判
稍遷南戶部主事轉禮部員外陞山東提學僉
事歷江西叅議河南叅政有玩芳堂摘稿遵巖

家居集

王元美云王道思如驚弋宿鳥撲刺道迅殊媿幽閒之狀

詩話劉淵材憾曾子固不能詩余嘗見宋人所輯唐宋八家詩韻則子固與焉不得謂非詩家矣評明人詩者不及王道思然道思五古文理精密足以嗣響顏謝而論者輒言文勝於詩非知音識曲者也

遊西山

良辰戾首夏肅軫遊西山山形何萃律洲渚互相繚奔
湍既下赴危峰亦上千谿硤石洞窈迤邐飛梁懸朱葩
晞陽谷翠羽蔭陰巒閤室象霞構疎甍憑風騫抗宇凌

層基列楹俯流泉好鳥揚幽音弱蕋濯清漣豈惟耽遠
遊因茲達大觀拾乳歷窾竄擷芳陵巘岼潄潄出礪淙
靄靄冒隴煙水碧間清藻靈飈茁瑤管履險神彌豁入
幽情更延隱巖懷子真蹈海期仲連遺形九州外棲迹
萬象顛崇深惟素秉神理迷真詮遊心迓冲漠斯道庶
不諼

山行

鴟夷泛左蠡康樂慕東甌屐泯無續蹤舟沉誰溯流至

人與物化曲士局時謀疑冰晒夏蟲將隨汗漫遊蛻蟪
既沿澗崎嶇復經丘振袂陟危巘解纓濯澄洲石滑時
藉蘭巖蹇或攀樛文芝榮華巔秀穎蔽平疇綠葉叢成
帟漱泉夏如璆霏霏雲出岫淅淅飈扶輶旨酒盈瑤卮
臨風自獻疇身已塵象超心與灝氣游緬懷羽化客高
舉不可留精搖生乃勞欲淺道則修簪紱為鞿紲撫已
竟誰尤

秋祀先師恭述

維馨歆歲事有恤恭明神豐功報宜重孔祀典攸敦明
明天子命宣哲協欽文咨惟百工長曰予克宅臣攝事
昭我將奏假具惟寅庶僚既濟濟多士亦振振肆佾表
殷薦大烹羞明裡格思儼無斃仰止儀自尊大哉聖人
德展為帝者賓

十二夜月與張子同玩感述

高旻蕩浮翳仲冬淑氣清良夜何未央憩坐臨前楹舒
景揚雲端皓魄委廣庭灝英鮮瑤席華彩鑒雕櫺稍稍

風露重微微河漢明眷茲泰宇寬展席諧芳朋撫景遺
俗迫即事寡氛嬰豈惟祛煩積亦以湛心靈戒盈君子
德和光達士情葆曜貞有孚養晦善自名

普光寺睡起

羣動各有營戚戚不得息嗟哉尺蠖徒煩蹇牽物役豈
謂塵中姿還寄雲外跡古剎絕浮氛法堂鮮來客首夏
澹新涼偃卧不知夕覺來盼高峰近遠各異色草搖席
下芳筠散尊中碧鳥語無俗音泉漱皆冽沍俛仰愜幽

賞去矣從所適

登金山口絕巔

地紀控西界靈山亘北甸足弱步履憇崖峭石猶踐枝
樛迺能援葛脆不可挽當其意象開豈復慮高蹇瞻峰
皆列施陟礪數迴緬稍覺天地寬即看雲煙變石竇芝
自榮林罅雪尚泣興闊無近尋登高有遠見周圻矗五
雲易水通一線微茫燕趙區歷歷皆可辨長嘯發靈籟
倦坐席苔蘚氛垢苟不嬰沉慮斯可遣

異典

南郊工就冬至前四日上親勤玉輅習郊禮於
壇上威儀卒度周折咸中小臣從觀其美作異
典

芝壇歛浮景休氣郁昭清晨旭流翠葆泰風颺華旌飛
龍麗重霄綈綏在天庭式禮紆皇步篤恭軫聖情几几
礪承舄亭亭雲耀紘秉離臨日鑒乘乾健天行升崇儼
帝對納陞惕陵兢周折並圓方興俛以屏營萬舞羅皋

帳廣樂敷咸莖度以哲罔忒文用道自弘卒事秩無僞
百辟具維刑疊疊不顯德千載揚徽稱

章丘縣校士六月十七夜月有作因示諸屬

日入羣動息子亦遂休茲稍喜喧濁屏徙步臨前墀仰
見明月出忽與心賞期湛曠神俱王虛明意自宜況逢
時雨霽宿潤含華滋品物各懷榮因得靜中窺始悟玄
寂理寧為躁競知亦有盈尊酒屢進不一持非此莫與
同真賞豈因之

遊大明湖晚至北極廟登覽

春城足遐觀攜手復嘉客
欲極高深趣停橈理輕策
林木飛鳥還蒼茫煙景夕
返照射巖丹遙空帶水碧
山色晦彌明人聲喧更寂
燈火起問閭漁樵散原澤
當歌浩思盈對酒沉憂釋
不知驩娛滯天表生皓魄

遊白鹿洞

素嬰丘壑情況秉英賢想
寤寐懸宿心遊盤得茲賞
重陰始晦蒙杲杲旋開朗
攬勝據巉巖探竒歷榛莽
境閒

百慮空意愜二儀廣野色淨巾衣秋容成物象菊含露
下英泉作山中響柔葉稍朝零剛條非夏長景光易流
徙今古同俛仰躊躇悵回軫何時還獨往

六合亭

亭宇憑虛空結構出妙境攀援藉葛藟毫末凌光景豁
達四天通夷猶雙目騁雲生當正襟風起吹方領泉脈
散千峰湖波澄萬頃煙霏自開斂魚鳥各翔泳即事天
機深忘言外物屏始知世上日不比山中永

遊麻姑山

雲出本無心，擇棲多奇巘。
繫予慕真勝，涉趣不知遠。
初緣碧澗行，幾傍丹崖轉。
林追去虎蹤，磴躡飛猿踐。
泉流遞淺深，巖谷變陰顯。
欽瀑遇留憩，石牀時仰偃。
桂芳洞裏秋霞映，山中晚探異尋。
前期入幽忘，後反神遊力不
惓。理愜情俱遣，天路如可梯。
欲以微官免。

餘干道中寄懷江午坡僉憲

湖水日夜綠，輕舟隨汭沿。
肅肅賓鴻羽，命侶悲楚天。
征

人正盈抱坐使憂思牽所思何為者我友阻良緣昔望
閣音容幾經芳歲捐緘素詞難極馳情間山川今來接
面目曾不須臾間四體為人役從事嗟獨賢倉卒執杯
酒沾脣不下咽新篇何由覲妙理未及詮宿懷如糾結
待子解其纏乍見翻違去持此竟莫宣

侯民部靜溪招遊甘棠湖陪憲使管復齋諸公

積雨夏陰生瀾漫湖水遍悔為一室拘幸奉方舟宴遠
嶼微出江雜芳正盈甸沿流始沂洄逗浦更游衍樹色

逐橈迴波容隨望變放情魚鳥間景昃不知晏一杯已
可歡況以偶時彥

洪方洲養疾山中惠訪草堂因而留館

裊裊桂樹枝涼風日將變生色難久留華光苦流轉夫
君如不來胡以慰偃蹇今夕良何夕悠然適我願片雲
本在山出岫亦游行吾園雖蕪沒物意皆疎遠以茲城
郭深豈必山林善開軒散煩促憑檻息步踐新甍起艸
頭白月浮池面蕭閒秋正初徙倚夜方半君自所好殊

疵客何足眷

訪空同先生故宅

久欲求遺草今來訪故廬
北窗存卧席東壁有藏書
墨沼春苔長琴臺夜月虛
年年桂花發人擬子雲居

過寧庶人故陽春宮

邪陌轉城闌重門曲水濱
人談亡國地花發舊宮春
珮冷空梁月歌銷積棟塵
堪悲當日事議讞帝家親

李元陽 一首

元陽字仁甫大理人嘉靖丙戌進士選庶吉士
除戶部主事擢江西道御史出知荊州府致仕
冬夜

漫漫冬夜長熒熒孤燭光山人自無寐
沈棲修竹房修竹夜淅瀝蕭灑吟寒
蟬朗月照戶庭鳴泉歸故塘別葉
棄寒風餘芳委嚴霜東壁正中昏
振衣起徬徨徬徨豈有他望道吁
升堂悠悠歲云暮遐哉猶面牆寸
陰與彈指久近不可量千古在須
臾安得不悲傷

何穉孝云此詩有蘧伯玉

及時勉學之意
非留連光景者

明詩綜卷四十五

謹案卷四十五第二十二頁後三行魯德舊作魯
迭今改後倣此

總校官庶吉士臣張能照

校對官檢討臣盧應

謄錄監生臣趙立福

欽定四庫全書薈要

集部

明詩綜卷四十六



詳校官編修臣汪鏞

欽定四庫全書薈要卷二萬五百十九

集部

明詩綜卷四十六

翰林院檢討朱彝尊編

羅洪先

六首

洪先字達夫吉水人嘉靖己丑賜進士第一授翰林修撰進左春坊贊善罷爲民隆慶初贈光

祿寺少卿諡文恭有念菴集

王元美云羅達夫如講師參禪兩處

著脚不堪高坐 穆敬甫云贊善多講學詩問有唐調 黃清甫云羅詩詞意貴顯雖取材不

遠而蜀

對爲精

靜志居詩話遠夫遠師擊壤近仿

白沙定山然爽氣尚存未墮塵霧

雜詩二首

故人萬里外夜夢忽在茲一去二十年宛若平生儀因
悲久離別再拜前吐辭舉手雙涕下自訴長相思覺來
天一涯彼此安得知豈無同心言道遠孰致之人生重
結交結交在當時對面不傾倒相思亦奚爲

煩歎不能寐披衣步前楹仰視天漢流衆星一何明萬

動皆有息人生何所營久佇風露下灑然當我情

獨坐

數月不出戶庭前多多陰閒看芳樹色一倍舊年深

山中雜詩

問我家何在山深多白雲巖前飛瀑下對語不相聞

後園續詠

二首

棠梨花開深淺黃燕子初飛日漸長草亭坐久客不到
半雨半風春太狂

南村雲起北村晴
晴鳩雨鳩更互鳴
東風吹雨衣不濕
我在桃花深處行

唐順之 十二首

順之字應德一字義修
武進人嘉靖己丑進士
除兵部主事改吏部尋改翰林
編修歷右春坊司諫
上疏請朝東宮奪職爲民起
兵部郎中巡視薊鎮還視師
浙直超拜僉都御史巡撫淮揚

天啓中追諡襄文有荊川先生集

穆敬甫云唐公詩典雅春

容綽有盛唐體裁

顏玄言云中丞古體如雲

津躍龍幻變其狀

近體如風間鳴琴幽逸有致

竝足流響詞林

胡元瑞云嘉靖初爲初唐者

唐應德袁永之屠文升王汝化任少海陳約之

田叔禾等爲中唐者皇甫子安華子潛吳純叔

陳鳴野施子羽蔡子木等俱有集行世就中古

詩冲澹當首子潛律體精嚴必推應德 蔣仲

舒云弘正間李何輩出海內遵之迨其習弊音

響足聽意調必歸剽竊雷同正變雲擾太史振

之爲初唐宏麗該整足稱羽儀 黃清甫云應

德初務清華晚趨險怪考其所撰若出二轍故

譽有所自毀亦隨之 陳臥子云應德氣象爽

邁才情駿發使能深造當有超乘其

後馳騁功名詭託講學遂頽然自放

詩話荆川開濟之才閎攬百家靡不融會毅然

自任天下之重倭人構患志在捍牧圉以保鄉

曲是時督師之權惟甬江梅林是寄公舍當局
二人誰可與談方略者顧不知者以公爲甬江
所薦介溪所知因此薄公豈惟昧於知人并不
識時務者矣其建平倭之策謂當禦之海外故
北自崇明南至蛟門乘桴破浪身作先鋒積勞
而殞是豈專馳騁於功名者耶襄丈之諡允符
公論也已公初與遵巖論文兩不相下既乃舍
所學從之竊怪集中五言古詩特少殆退舍以
避遵巖也至於律詩
質不傷大麗而有體

送孔上公助祭太學歸闕里時賜袞衣一襲

國喜嘉賓至人攀上客行
來觀周室禮去入魯王城
新袞山龍炫餘堂金石鳴
聖朝稽古意待爾示諸生

同皇甫子循游橫山

曲磴行來盡松陰轉寂寥不知茅屋近却望石梁遙葉
響疑聞雨渠寒未上潮夫君軒冕客此地欲相招

送白尉往湖州

君家太湖北作吏太湖南驛路雞鳴近山城樹影含萬
川疏沃野百室競春蠶幸此猶吾土微官也自堪

張相公壽詩

帷中運策九州清共說留侯在漢京賜第近連平樂觀

入朝新給羽林兵儒生東閣承顏色首長西蕃識姓名

却望上台多氣象年年長傍紫宸明

鍾廣漢云壽詩如此典重允稱拔俗

廣德道中

蒼山百轉見炊烟茆屋高栖古樹顛
細雨薜蘿侵石逕深秋秔稻滿山田
雲中望影迷遙岫草裏聞聲覺暗泉
儻遇秦人應不識只疑誤入武陵川

聞復官報京師友人

姓名不復挂朝參魚鳥由來性所耽
篋裏符經都已廢

山中藥草漸能諳
疎狂自分三宜黜
嬾病其如七不堪
深謝故人推轂意
莫將陽羨比終南

崔鎮道中晚望懷陳約之

郊原極目思依依
楚水連天楚樹微
遠浦潮生人獨往
寒林風靜鳥雙歸
泥塗自覺朋游好
日月偏催旅鬢稀
念爾同爲南竄客
烟波何事更相違

覽徐養齋見懷毛古菴及小子之作存沒感懷和韻

早歲曾陪杖履遊遙思墓木已三秋美人去後空聞笛
芳草歸時獨倚樓世上玉顏還易老山中石髓杳難求
却慚司馬頻相許擬向清湖共釣舟

冬至南郊

明王敦大報泰時禮神居位以南離正宵從甲子分月
臨太乙館星動羽林軍除道疑登岱鳴簫異度汾聲容
六變合海嶽百靈紛封檢微題字屏帷悉畫雲神光人
共見天語帝親聞盛跡誰能賦多慚扈從羣

松關

月出照松關松陰正滿地恐有山僧歸終夜不須閉

筠徑

面面隔深竹茅齋在何處遙聞犬吠聲試從此路去

古北口

諸城皆在山之圯此城冠山如鳥巢到此令人思猛士

天山萬里鳴弓弰

李開先 三首

開先字伯華章丘人嘉靖己丑進士除戶部主

事改吏部歷員外郎中擢太常少卿提督四夷

館罷歸有閒居集

朱中立云中麓著作甚富一韻百篇蓋白樂天之流也詞

浮意淺絕墨妙

中多何尚焉

詩話中麓撰述潦倒掄疎然最高好事藏書之富甲於齊東詩所云豈但三車富還過萬卷餘又云借抄先館閱博覽及瞿曇是也先時邊尚書並泉劉太常西橋亦好收書邊家失火劉氏散佚無遺獨中麓所儲百餘年無恙近徐尚書原一購得其半予嘗借觀愛籤帙必精研朱點勘北方學者能得斯趣殆無多人也噫嘻文淵閣藏書例許抄覽先具領狀以時繳納世所稱

讀中祕書蓋謂是已奈典籍微員收掌不慎歲久攘竊抵換已鮮完書可爲浩歎聞中麓後人尚餘殘書數十部巡撫丹徒張公物色之中有陸農師禮象一編張公歿後訪之不能得矣

苦熱

昏中日在柳炎帝司其職苦渴多病身煩熱何相逼
浹旬難夜眠近午始朝食止螫藥無能驅蚊扇無力莫爲
觸暑行且就繁陰息官微罷復久賜冰胡可得神馳寒
露臺夢想雪山域妄念不須存秋涼當在即

塞上曲

二首

虎旅紛紛列虎牙
龍庭漠漠走龍沙
未交八月先飛雪
已盡三春不見花

一春不見煖融天
自是要荒氣候偏
落地雪花原是雨
漫天榆莢不成錢

呂高一首

高字山甫
徒人嘉靖己丑進士授戶部主事
改兵部歷郎中出爲山東提學副使轉行太僕

少卿有江峰漫豪

莫子良云先生詩本初唐燕國曲江二張而晚出杜陵大

應諸

子間

詩話詩莫盛於正德文莫純於嘉靖之初自後
七子派行而真詩亡古文亦亡矣山甫與富順
熊過叔仁名在八才子之列雖未能驟乘王唐
亦一時之雋也王浚川數當時作者有唐子羅
子趙子王子江右則有尹子曾子胡子陳子尹
名臺字崇基有洞山集陳名昌積字子虛有龍
津集曾胡二子
不能悉舉矣

省中直宿

疎星歷歷露瀼霜獨宿瑤宮夜未央樹色暗浮天仗外
香烟遙接御爐傍鈞天月上聞長樂玉漏風移出建章

不遇武皇行幸日空憐頭白滯爲郎

陳東 五首

東字約之鄆縣人嘉靖己丑進士選庶吉士改授禮部主事已復改編修出爲湖廣僉事徙福

建轉河南提學副使有后岡集

王允寧云后岡誠穎秀第語淺

氣促寡詩人之致

皇甫子循

云約之詩早鑄

四傑晚鑑二張道軫平原晞駕康樂

王元美

云陳約之如青樓小女月下墜篋初取閒適終成淒楚又如過雨殘荷雖爾衰落嫣然有態

顧玄言云約之詩篇篇都秀潤句句少警拔亦就色相中自然寫出 黃清甫云陳詩巧構新

思善詠故跡垂而不靡舊而彌鮮益以筋力美
篇豈少哉 陳臥子云約之典禮之作依然司
隸衣冠

詩話約之取組
六朝亦稱典則

咸寧山中雪霽晚行

雪霽乍見山殘陽稍辭嶺暝色起烟氛寒光散墟井田
空獵犬還林凍棲鳥警遙聞野寺鐘初月生俄頃

晚望有懷

高閣罷餘霧曠然見遙岑依微夕照滅窈窕寒雲深隱

几獨成趣據梧時自吟惟當草玄者寂寞知予心

還浙夜泊江口

越嶂宜春望江舫入夜乘潮移諸島出雲卷數峰層近
郭翻多戀還家獨未能北堂今夕夢先已度西興

都下秋雨夜飲王子長宅

闊別時何屢蹉跎鬢已侵還朝明主賜卜夜故人心涼
雨杯初覆空堂漏欲沈安知非夢寐相對帝城陰

送李子

山城細雨綠無滋黃鳥關關送別時海內爲鄰千里近
湖邊傾蓋十年遲蟬聲驛路催官騎草色河橋映酒旗
遙想經行多逸興逢人莫不寄新詩

任

瀚二首

瀚字少海南充人嘉靖己丑進士繇吏部主事
補春坊司直兼翰林簡討有忠齋橐

詩話少海遇青城山異人授鴻寶修煉法家中
盤盞皆黠汞銀爲之同時熊叔仁亦好服食煉
形之說而羅達夫之死燕齊海上之士或言其
仙去是時予詞丹籙西內尚未營齋而諸君愛

道實開其先已少海老去自吹秦觥栗
西征曾比漢嫖姚之句詩家類多稱之

病懷

海甸逢南菊殊方也自花江淹新臥病王粲老無家皓
月千門夜秋風雙鬢華還持石函記勾漏訪丹砂

五丁峽別衡崑

峽天猿嘯萬山秋御宿相逢轉別愁後會知誰先白髮
清時勞汝問滄洲繩牀對月此村夜霜杵擣衣何郡樓
聞道西京最蕭瑟可堪歸路曲江頭

程文德一首

文德字舜敷永康人嘉靖己丑賜進士第二累
官吏部左侍郎兼翰林院學士改南京工部左
侍郎贈禮部尚書諡文恭有松溪集

長洲訪常劉二子

監與春曉度浮梁懶問城闌六十坊小艇忽臨山盡處
美人宛在水中央疎籬仄徑紆村巷穉柳夭桃映草堂
流寓江山元有分脩然安土即吾鄉

蔡雲程一首

雲程字亨之臨海人嘉靖己丑進士歷官刑部尚書

登雷港驛樓

空江返照映孤洲晚泊聊登驛外樓可歎羈懷無住著
挂帆隨月下舒州

楊博一首

博字維約蒲州人嘉靖己丑進士除盩厔知縣
徙長安徵授兵部主事歷郎中出爲山東提學

副使遷參政以僉都御史撫甘肅進右都御史
兵部侍郎升尚書加少保改吏部晉少傅尋加
少師兼太子太師卒贈太傅諡襄毅有虞坡集
送雷信菴出按甘肅

湟中形勝地尚記昔年游清海崑崙斷黃河積石流左
賢失右臂上將得前籌爲問乘槎客何時到隴州

胡松一首

松字汝茂滁州人嘉靖己丑進士累官吏部尚

書贈太子太保諡莊肅有集

舍弟病久得書知小愈喜而有作

汝病經年久常時繫我思池塘春草夢江海鵲鷁詩歲暮悠悠別天涯寂寂時忽傳消息到喜報細君知

鄭大同 一首

大同字皆吾莆田人嘉靖己丑進士歷官刑部右侍郎贈尚書

天游觀

輕輿斜日上高峰
瘦竹疎花萬壑風
獨鶴一聲松影亂
月明人在白雲中

楊爵一首

爵字伯修富平人嘉靖己丑進士除行人擢河南道監察御史上書劾夏言郭勛因極言朝政
廷杖繫獄者再久而得釋卒追諡忠介有斛山
集

詩話斛山手觸逆鱗甘以其身顯棄封事大略
謂目前之憂甚大大抵因仍苟且兵戎廢弛公

私因竭奔競成俗賄賂通行遇災變而不憂非
祥瑞而稱賀諛諂面諛士風民俗於此大壞而
國之所恃以爲國者掃地盡矣又云天下之患
莫大乎以危爲安以當爲利實則可憂而以爲
可樂法家佛士日遠而快意肆情之事無敢有
齟齬於其間積弊而至於蠱則不可得而救矣
永陵見之震怒下鎮撫司重咎下獄於時晉江
周主事天佐救之而死大監浦御史鉉再救之
而又死繫獄五稔始得釋纔旋里永陵復諭東
嶽拘之斛山之在獄也校尉蘇宣喬某楊棟獄
官洪百戶咸哀焉及再被逮緹騎亦憐之不相
促迫斛山飯已即行立門屏前傳語家人曰有
旨見逮吾行矣觀者流涕獄中撰周易辨錄其
論文云大以理爲主以氣爲輔不以偏邪之見
亂其心本諸聖賢之言以充養之如此則造語
皆自胸中流出其吐詞立論愈出愈新而無窮

如日月在天窮居深谷花石草木之微青者自
青白者自白仰之以生輝觸之而成色矣旨哉
言乎詩則信口
而作不求工也

中秋懷友

寂寞復寂寞還如去歲秋美人消息遠令我心悠悠吳
水既東去泰山不可求思君譚道處念此日幽憂

林恕

三首

恕字道近長樂人嘉靖己丑進士歷官雲南按
察使有西橋集

詩話西橋近詩依然

林子羽王安中流派

舟次白沙驛

長安何處所孤櫂發閩關
白擁沙邊驛青迴江上山
風濤添別淚村酒破愁顏
羨爾溪中鳥閒雲共往還

同蔣蒙菴朱豹厓登合浦海角寺

共是天南客相攜海角行
山連銅柱界水匯越裳城
落日潮聲起高秋蜃氣清
故鄉回首望歸雁斷南征

宿唐浪村

黃精釀熟豆初花
籬落蕭疎遠市譁
地僻虞羅依山曲
天寒漁火傍江叉
燕尋舊壘穿重幕
竹引新篁過別家
對景蕭然幽興發
可甘萍梗負年華

薛甲一首

甲字應登江陰人
嘉靖己丑進士除
兵科給事中
以言事謫累遷江
西按察副使致仕
有畏齋類稿

生居

生居盈萬間死居纔七尺七尺已有餘萬間何戚戚造
物與我身此身應我役曷以我身故令我不自得

楊祐
五首

祐字汝承錢唐人嘉靖己丑進士有丹泉集

詩話汝承諸體滿灑拔俗今鄉
鄙論詩無人屈一指者可歎也

荅陳李二侍御

吏隱滄洲遠江楓伴索居秋風一雁過忽枉友朋書獻
納看君輩聲名動直廬東南民力竭奏記意何如

湖夜

湖夜熒熒白蘋風
嫋嫋秋斷霞斜照雨冥霧濕依樓萬
國仍多難浮生祇百憂滄江有漁笛何事獨悠悠

雨懷

山城積雨春無事江閣停雲晚自怡
芳草不知隨處合賓鴻何意獨歸遲
壯游東閣題詩處恩幸南宮錫譙詩
風景不殊京闕異江湖深繫廟堂思

九日登泰山

殊方此日逢重九絕嶽高吟散遠愁漢時秦封空往事
紫萸黃菊自深秋天清樓閣明三觀野曠山河辨九州
獨是懷親憂國意白雲滄海共悠悠

簡田長官

矯矯田郎三輔賢省曹播越五經年河洲水竹新開郡
暇日閒看沙鷺眠

陳子文一首

子文字在中閩縣人嘉靖己丑進士歷官湖廣

按察副使

夜泊皖城村舍

孤舟野泊初遠寺疎鐘起茅屋兩三間懸燈深樹裏

桂天祥一首

天祥字子興臨川人嘉靖己丑進士由兵部主事改監察御史巡按山西山東出知大名府

發和州

樓船開旭日涼露灑征衣擊楫橫江浦投詩采石磯潮

來紅蓼没人語白鷗飛天際瞻宮殿金陵在翠微

吳子孝

四首

子孝字純叔長洲人尚書一鵬子嘉靖己丑進士改庶吉士授工部主事以光祿寺丞出爲湖

廣參議提督太和山有玉涵堂豪

皇甫子循云龍峰才情既

美興寄尤深其詞婉以麗其響和以平其思悠以雋故能蓄藻於建安騰聲於天寶希躅於少陵逸駕於長慶

詩話純叔籍甚詩名特格未高聳其論詩云世之薨童牧豎矢口而成章田翁野嫗發聲而中

節彼蓋不知何者之爲詩況詩之所以妙何也
天地之機洩之於人者不知其所以然而然也
夫詩以言傳亦以言隱求之於迹者非也求之
於音者亦非也求之於揣摩擬議者亦非也數
語足當正嘉
詩人鍼砭

燕

數見沙頭燕翩翩故傍人定知巢已就偏愛語相親碧
樹江波闊烏衣故國春卷簾誰寫汝飄泊數沾巾

送郊薦和奉使東萊

上宰承周賄王官抱楚才堂封鸞詔下鏡吹錦帆開海

屋魚龍夜仙宮日月臺相如誇負弩旂節幾時迴

秋日與子浚子約小集子循甫赴日南

莫問銀河淺須憐玉笋空洛雲三歲隔楚月一宵同風
樞悲窮驥秋砧亂候蟲新涼有離思萬里憶征鴻

送楊獻甫之官四川行閩參軍十二韻

越雋憐君去相違萬里餘軍參孫楚事筆草孟嘉書魚
鳥驚新陣貔貅耀舊旗桄榔山葉暗躑躅野花疎村女
誇撞布羌人趁葦墟地當三蜀險府控百蠻居關徼留

縑日風雲按轡初巴渝歌甚樂兵騎報寧徐才重松州
慕恩垂河水車遷喬應不忝學武昔無如贊畫元戎喜
籌邊勁寇除少年誰得似俠氣滿諸胥

沈愷 二首

愷字舜臣松江華亭人嘉靖己丑進士歷官寧
波知府升湖廣右參政有環溪漫集

徐伯臣云鳳峰長子

律 皇甫子循云環溪閱眇之製湛思以宣綺
麗之詞緣情而得齒鼎之貴不能奪尊鱸之思
熊軾之並無以輓為舟之興不既深於詩乎
穆敬甫云沈詩肉骨勻稱條達不滯 李時遠

云舜臣詞翰滿

灑肯出塵之致

園中雜言

二首

洪鈞陶萬象品彙皆天情四時忽代謝歲功賴有成物
理鮮常盛天道有虧盈哲人秉大觀所以稱達生伊余
無所好夙抱幽人貞一丘常自足千駟良可輕寵祿豈
足貴賤者乃有名

中歲不自好營慮相糾纏寧如返初服停策倚林泉豈
不羨松喬生本無僊緣鍊形得長生此事終茫然有溪

亦可漁有山亦可田營已良已足踰分詎自金青陽不
再御朱華苦易捐欣然命旨酒且以娛天年

王穀祥

二首

穀祥字祿之長洲人嘉靖己丑進士官吏部主
事有酉室集

梅花

風引上春香雪弄江南色
爲有惜花心樓中莫吹笛

水仙

瑤環月下鳴翠帶風中舉胡然洛浦神胡然漢濱女

沈謚一首

謚字靖夫秀水人嘉靖己丑進士除行人擢吏
科給事中終江西按察僉事有石雲家藏集

詩話先生師於陽明甘泉友于龍溪窮
研理學故其詩品亦在元豐淳熙之間

游殊勝寺

畫舫連雲動驚濤帶雨飛青山天外出白鶴寺邊歸僧
偈傳金粟蟬聲隱翠微洞庭乘興遠直欲老漁磯

蔡駿一首

駿字天章寧晉人嘉靖己丑進士除行人擢浙
江道御史坐劾汪鏐廷杖爲民尋以原官起用
再謫山東按察知事隆慶初復職致仕有浚濱
集

過桑乾河入雲中

白草黃沙漠使稀桑乾渡馬駐斜暉孤城雉堞依黃土
古戍狼烟起翠微入夜角聲驚客夢凌風霜氣裂征衣

雲州一望天連水惟是山頭朔雁飛

周顯宗一首

顯宗字子孝濮州人嘉靖己丑進士除秀水知縣歷官漢中知府有桃村山人自適亭

詩話桃村於詩未臻門徑惟意所之自序稱感興而作不事強索亦未嘗規規於古人自知之明亦已審矣集中絕句小詩有偶合者

宿安平驛

湖靜水初合人喧市晚收夜深誰共語寒月獨登樓

莊一俊 一首

一俊字君槩晉江人嘉靖己丑進士官至參議

小居

雀飲硯池水蝶翻菜圃花雖非高士宅終是野人家

張意 一首

意字誠之崑山人嘉靖己丑進士官南職方郎

有日涉園藁

皇甫子循云誠之詩無取模擬而問合雅音本之性靈得於天趣也

詩話誠之與兄情後先取甲第情有公餘寓拙藁詩無足錄者自序以爲習氣未除興到輒就

不求其工自適其適可
謂得失寸心知者也

世宗皇帝輓詩

神謨憑玉几顧命託儲君
詔下輪臺悔哀傳溥海聞
弓號遺劍舄龍去失風雲
丹宸依然在宮鑪冷夕熏

楊本仁一首

本仁字次山杞縣人嘉靖己丑進士有少室集
山行

山路登攀倦鄉園何處邊
迷津歧路口立馬亂峰顛
白

髮雙親遠黃河一綫懸
俯看鴻鴈影難寄益門篇

曹世盛 一首

世盛字際卿閩縣人嘉靖己丑進士歷官廣西

參政有方坡集

送凌應賢判常德

雄郡開南紀行旌出北燕
別憐孤館夕交憶故鄉年
曉月沉平楚春山帶遠烟
離魂與孤鴈共逐洞庭船

孔天胤 一首

天胤字汝錫汾州人嘉靖壬辰賜進士第二以
王府親外補陝西提學僉事歷浙江右布政使
有文谷集

詩話管汾山人如新調鸚鵡

雖復多言舌音終是木強

鴈山峰洞巒壑之勝水石之奇雲物之美多在靈
巖予往臨眺述景散懷

紆纒試委塗迴策亦尋壑過澗厲潺湲攀厓凌峭巘步
滑苔已沉手援葛猶弱磴竟造幽禪山平臨化閣列峰

非一奇芳林紛沃若空水望如烟絕巖驚欲落深洞海
冥冥曾城天漠漠雲物倏然改霞氣時間作景與玄閬
并跡乃靈仙託將乘琴高鯉或馭王喬鶴

朱衡一首

衡字士南萬安人嘉靖壬辰進士除尤溪知縣
徙婺源徵授刑部主事累官右副都御史巡撫
山東入爲工部侍郎改吏部升南京刑部尚書
尋以工部尚書兼副都御史總理河漕加太子

少保召還掌部事有鍾山臺

十四夜待月

日入石梁暝攜僧待華月萬籟方激瑩孤鐘助淒越素
影澹青襟清輝鑑玄髮憮焉遐意存暢矣浩歌發歌聲
難以竟流響振林樾

閔如霖

一首

如霖字師望烏程人嘉靖壬辰進士歷官南京
禮部尚書贈太子少保有午堂集

游迎恩寺甯氏園林

逕轉金沙淨壇依石洞幽樹深寧受暑蛩咽似迎秋空
翠含雲落新泉帶雨流歸驂楊柳陌十里暮烟浮

蔡汝楠

三首

汝楠字子木德清人嘉靖壬辰進士除行人遷
南京刑部郎中出知衡州府歷江西參政山東
按察使擢兵部侍郎改南京工部有自知堂橐

唐應德云白石盡洗鉛華獨存本質 侯舜舉
云白石詩諸體皆合五言類陸機洗約易者擬

子昂七言近體與盛唐諸公相軋而七言古多
似高岑五言近體多似王孟 穆敬甫云蔡詩
思深語險不落塵詮 洪朝選云蔡白石弱冠
即以詩聞初學六朝既而學劉長卿最後又學
陶韋 王元美云蔡子木如嬌女纖流黃不知
絲理強自斐然又云子木少時雅慕建安晚攻
錢劉索然易盡 顧元言云司空詩聲調清雅
情興高朗晚歲率意應酬似出二手 黃清甫
云子木登第最早服官留都與皇甫伯仲日相
倡和雅有令譽送別登臨佳句未嘗不在人口
也既而官爵日尊詩格日

損必窮乃工豈其然邪

詩話白石詩名籍甚與四皇甫相酬和唐應德
亟賞之云白石今之名家也一變而得古作者
之精僕非知音亦三歎不能自已而其鄉錢守
中撰竹里老人沈宗殷傳備述正嘉之際湖州

人物之盛有云長興則吳布衣琬安吉則陳大
參良謨烏程則凌訓導震歸安則嚴知府鳳吳
知縣廉唐主事樞德清則沈僉事松武康則駱
縞修文盛而劉尚書麟自江右至居蒙鳩孫山
人一元自陝西至居戴山
云云獨不及白石何與

武夷山詩

夙慕武夷遊已入晴川境稅我塵中車振衣三秀嶺樹
暝疊浮嵐溪虛寫澄影石竇通海流猿巖嘯峰頂空洞
駭迴聽遠峯眩殊景倏爾昇雲烟兼復徹軒屏晨翠流
耳目宵陰濯襟領靈跡冠閩甌真機會箕穎榮素寔殊

塗俾予發慙省

化劍閣贈田柅山督學

昔與君子別乃在荆門山雲濤緬相失五載隔五關武
夷寧不懷欲來分水艱不因覲省暇何能晤清顏信矣
延平津神會自昔然高閣出幽岫雙溪迅驚瀾山雨炎
燠銷林華分藻繁泓澄隱風雷磊落明琅玕方諧意未
悉將別念彌難豈無聲音及獨悵形蹟單有緣期後逢
更極平生歡握手何以贈永好在弗緩

送陳郎中出守廣川

戀別南州守聊爲越客吟
三江看鴈盡五嶺入雲深
風氣通蠻落人烟接海陰
炎方將帝命并切飲冰心

呂光洵一首

光洵字信卿紹興新昌人
嘉靖壬辰進士累官
兵部尚書兼副都御史
巡撫雲南改南京工部
尚書未任卒有期齋集

立春前雪應制

天惟玄德感帝念小民依送臘能呈瑞先春果應祈雨
儀渾竝色萬有倏交輝欲繼周文詠還輕郢曲稀

林應亮一首

應亮字熙載侯官人嘉靖壬辰進士歷官戶部
右侍郎總督倉場有少峰集

宿會江

古驛山城外寒江客到稀潮平見魚戲葉落聽禽飛遠
火行人語荒原古渡歸徘徊不知夕零露忽沾衣

范欽 五首

欽字堯卿一字安卿鄞縣人嘉靖壬辰進士累
官兵部右侍郎有天一閣集

詩話堯卿格律自矜常取材太近時倡和者沈
嘉則呂中甫諸人未免聲調似之其藏書最富
今浙中舊族若山陰鈕氏祁氏吳興潘氏沈氏
馮李項氏邵氏高氏胡氏遺書盡散惟范氏籤
帙尚存惜未能
泝江就問也

江上翫月

萬里空江月孤舟日夜看關山何處是烏鵲不勝寒氣

逼銀河轉光含玉露團踟躕瞻斗極彷彿辨長安

寄陳駕部國祥

不見陳司馬蹉跎幾歲年長江無旅鴈絕塞有風烟羽
檄連宵動瘡痍何日痊憑將賈生疏太息漢庭前

雪中簡王惟和

寂寞梁園客迂迴剡曲家一冬初破雪萬里正飛花帶
雨斜侵幔迴風曲抱沙相看如不醉辜負此年華

姪澈使滇南

鳳歷千齡啓龍圖六詔傳雲開星使路地近夜郎天頒
瑞符虞典祈靈異漢年可令壽國計人復數張騫

東歸次錢唐先寄弟

月落天將曙風高浪欲層夜來春草夢先已度西陵

蘇志臯

一首

志臯字德明固安人嘉靖壬辰進士除瀏陽知
縣徙進賢徵授刑部主事歷郎中出爲僉事遷
副使升布政使以僉都御史撫遼東進右副都

御史有寒邨枹罕二集

早朝奉天殿接詔

禁漏沉沉曉色遲迴廊華月隱參差玉階直接承明殿
銀漢遙通太液池咫尺雲圀頒聖詔逶迤宮扇肅朝儀
微臣亦見天顏喜未必長教近侍知

顧存仁 二首

存仁字伯剛太倉州人嘉靖壬辰進士除餘姚
知縣入爲禮科給事中以言事廷杖編管保安

隆慶初起用官至太僕寺卿有東白草堂集

薛仲

常云吳中詩大都模擬而出雖自相誇詡稱爲作者而知言之士不無遺論矣伯剛諸體溫厚和平忠愛惻惻根諸心而寓諸言不假組織而依詠成章得雅頌風騷之遺 周子籲云居庸

山人詩和

平雅澹

詩話陸子餘劾張桂作秦時鬼嘯于庭顧伯剛起草則鬼近榻前其聲迫矣詰旦鴉又鳴戶上而兩公直言不諱雖受廷咎未嘗殞命使有畏縮何以成名乎伯剛所言五事其一論及黃冠故峇鴻山漸山詩有潮海空傳佛骨書之句也是時金錄青詞猶未盛而徙薪曲突君子重其知先幾焉

岔道

目極長安嶺春生岔道屯
看花頻掩淚聞鴈欲銷魂
隴霧侵衣濕風沙隔面昏
據鞍悲髀肉徒切壯心存

對月

清光此夕寫誰秋
關月能禁故國愁
何處笛聲吹不斷
臥看北斗挂城樓

周復俊 二首

復俊字子顓太倉州人
嘉靖壬辰進士仕至太

僕寺卿有六梅館集

詩話子顯既綜鄉黨之詩爲玉峰詩纂而以已
詩請楊用修評點亦稱好事第諸體多膚淺不
足觀

涑水官舍感懷

今夕復何夕倚此明燭光疎星燦前帷三五河漢旁天
寒邊雲白歲暮埃草黃古云易水寒重以繁露霜迢迢
遠行遊塗軌浩無方眇余苦不達素髮垂中堂所嗟志
徒勞四牡厲周行

白水驛早發

東方日未明寒林鳥將散
靄靄川霧昏縷縷邛烟亂
崩雲臥岑崖狂飈決門閑
迢迢白水程栗栗墮岸陰
陰蟲知曙喈喈雞迎旦
狻猊儼狙伏徒御失魚貫
稍聞滇水寒已習炎方曠
涼冷雖迍時陰陽自貞觀
吹萬感感發致一疑漉漫
霜封紫柯榮冰蝕丹蘄
祭遊子悲遠鄉夙興轉
勞憚朱輪一何翩玄冬
豈爲玩駢駢激靡懷鬱
鬱累方歎五斗陶令奔
一瓢許君判扣角白石
罌乘桴

滄海懷求言緝修軌末以塵嬰絆

浦應麒

一首

應麒字道徵無錫人嘉靖壬辰進士官春坊贊善有後嚴集

次韻強德州

林屋秋高已自涼
山中新酒熟鵝黃
銀絲豈必鱸魚膾
金粟齋飄桂樹香
泉石最憐微著雨
芙蓉最好未經霜
臨流不盡歸橈興
隔水漁燈見小航

呂懷一首

懷字汝德廣信永豐人嘉靖壬辰進士改庶吉士歷官南京太僕寺少卿有巾石先生類藁

阻風登觀音閣用韻

憑高獨上觀音閣落日還登燕子磯
鳥道重重高峽險烟波漠漠遠山微
岸吹夜浪豚相拜厓護春巢鷁遠歸
聞道靈輿回北闕歡心直向五雲飛

王梅六首

梅字時魁平湖人嘉靖壬辰進士選庶吉士除
刑部主事謫判滁州有柘湖集

詩話柘湖風神韶亮得無累
之神絕句小詩尤見清拔

送林節推赴任瓊州

見說瓊州地烟中疊浪開遠天分島嶼晴蜃結樓臺水
館鮫人識風檣賈舶來桄榔秋樹好莫怨夜猿哀

登滁州城

淮北淮南節候同荒臺無限北來鴻愁成短夢青山外

倦倚高城夕照中
雲樹不堪連海岱
商歌何處起秋風
橫塘寂寂蘋花老
欲采寒香薦醉翁

江干曲

估客乘潮去
春風幾度寒
江湖元有信
日日至長干

偶成

滁州城樓雲滿梯
滁州城下水連堤
臨流欲渡無舟楫
愛殺江離葉正齊

題畫寄張廷瞻

渺渺平蕪淺淺沙垂楊疎處見人家二年京洛緇塵滿
愛殺芳洲杜若花

南津

南津津頭春水新草堂滉漾搖青蘋漁歌宵宵遠山碧
時有鷓鴣飛近人

許應元

二首

應元字子春錢塘人嘉靖壬辰進士除泰安知
州徙泰州徵授刑部員外郎進郎中出知夔州

府升四川按察副使調廣西遷右布政使有漪

堂豪

皇甫子循云子春短
律淒清長歌瓌壯

再過懷玉感述

瑟瑟零雨暮熒熒燈燭光我僕亦已痡偃息臨廣堂我
何獨不寐起坐思縱橫念我同懷人遠遊在冀方豈無
二三子與子共翱翔良友信可懷寧知非爾兄引領既
北睇側身復東望倚閭久相待何以遲遲行修途繇暑
雨塗潦沾衣裳願言託晨風飛止即故鄉

已酉夏宣城道中作

水國去已遠旱陸茲方永朝行指墟烟午餉閱田井曲
薄蠶事歇來牟供積秉丁男與紅女所務良自黽予亦
勤餽粥安能厭馳騁微月沈西麓羣壑倏已冥杳謁聞
鐘聲幽林隔人境且復息微躬明發還耿耿

錢業六首

嶸字君望揚州通州人嘉靖壬辰進士歷官參

議

憫黎詠 六首有序

嘉靖戊申崖吏失御重以積蠹之餘羣黎遂叛
攻掠城邑遠近繹騷撫者無策漫以牛酒從事
越歲不戢當路請命征討予分典戎事深悼誅
夷之慘用廣咨諏卒藉天威誅獲渠首殲蕩醜
類總五千餘級諸邨悔過悉歸順焉庚戌夏四
月三日奏凱底定追惟致寇有因覆車當戒感
時述事潛然有懷

在昔邃古初鴻濛闢天地巨擘嶂南海五指鬱蒼翠中
有黎母居伊人尚蒙昧鑿井以飲渴農田亦時藝荒路
暖匪通幽局或交市雖爾隔華界猶紀王正歲生黎若
草木榮隕隨和厲孰教若鳥獸于何勞智慧所以古先
聖馭之以不治

粵南本炎嶠矧此瓊崖東玄冬日且和幽郊鮮陰風花
柳陰廣隰茁黍青芄芃皇仁漸南極草木均化工豈獨
茲黎人物與非吾同軍行直人日感歎心沖沖

朝發城東門夕駐藤江壘殺氣千層雲狼師渡滕水雞
犬皆震驚人民盡奔徙海避愁蛟蛇山匿畏虎兕蛇虎
猶可虞狼毒不可邇軍令甚分明顛仆何由弭伶俚泣
路衢迸淚不能已嗟哉一將功豈獨萬骨毀

海南無猛虎而有麋與麋玄崖產珍木種種稱絕奇斯
物出異域頗爲中國推以茲重徵索奔頓令人疲窮年
務采獵爲官共饋儀苦云近歲盡無以充攜持直欲訴
真宰鏹此蘇民脂物理固有然忉怛勞人思

葉落當歸根雲沈久必起黎人多良田征斂苦倍徙誅
求盡餘粒尚秦犢與豕昨當租吏來宰割充盤几吏怒
反索金黎氓那有此泣向邏者借刻箭以爲誓貸一每
輸百朮削尤相擬生當剝肌肉死則長已矣薄訴吏轉
嗔鎖縛不復視黎兒憤勇決挺身負戈矢鎗急千人奔
犯順非得已赫赫皇章存今人棄如紙

朔風戒良節赫赫張皇師軍門號令嚴震肅將天威壯
士快鞍馬鋒鏃如星飛一舉破賊壘刀斧紛紜揮剖尸

越丘阜踏血腥川坻白日暗西嶺瘴氣昏餘暉翅鼠墮
我前饑烏逐人歸征夫懷慘憂涕泗霑我衣黎人本同
性云胡登禍機神武貴勿殺不在斬獲焉息火當息薪
弭兵當弭饑誰生此厲階哲士知其非

尹耕十四首

耕字子葉蔚州人嘉靖壬辰進士由兵部郎中
出知河間府升河南按察僉事坐劾戍遼左有
朔野集

詩話李何詩派並行曾未幾時而學李者漸少
宗何者日多學李得其風骨者前有凌溪後有
朔野而已朔野以邊才自負一蹶不振
坎壤而終詩如曉角秋笳聽者悽楚

修邊謠

去年修邊君莫喜血作邊牆牆下水今年修邊君莫憂
石作邊牆牆上頭邊牆上頭多凍雀侵曉霜明星漸落
人生誰不念妻孥畏此營門雙畫角

照縣道中

嶺峻橋橫渡泉懸水逆流映空峰影亂觸石浪花浮
歲

月悲行役衣冠憶舊游望鄉雙淚眼休上最高樓

韓淮陰侯廟

背水空留陣良弓早見收身危緣震主面相止封侯落
日荒祠道西風澗水秋君臣終始義爲爾淚長流

漢壽亭侯祠

盪寇襄樊日長濤滄魏軍氣雖雄百戰功竟偃三分鬼
馬騰空阜靈旗掣亂雲神絃朝暮曲長向嶺頭聞

秋興

四首

銅龍春闕曉光寒
金水橋橫白玉欄
見說漢皇求太藥
故邀王母到長安
黃金夜獻文成竈
青鳥朝翔太乙壇
不是歲星陪帝輦
蟠桃誰奉殿中歡

薊門千里接雲中
燧火清宵警報同
合陣幾窺青海月
鳴鞭爭下黑山風
殘冬戰士衣仍薄
荒歲孤城廩欲空
南國十年輸輓盡
防秋諸將慢論功

十萬鳴弦報吉囊
野心狼子是花當
連姻故自輕中國
分道頻看入漢疆
推轂丈人空肉食
操戈遺孽尚蕭牆

不應干羽修文日歲歲三關有戰場

威名萬里馬將軍白首丹心天下聞
遼水旌旗餘殺氣泰山松柏已高墳
條侯自靖中州變實憲曾名塞外勲
獨倚凌烟思將略暮天征鴈下寒雲

上谷歌

四首

太寧無路援開平極目孤懸獨石城
遙憶先皇親躍馬長驅絕塞苦提兵
寒流汨汨交樵徑野戍荒荒列漢旌
千載土人談往事巴延山下有英聲

永寧山外黃花鎮隆慶州傍土木城千里風烟開紫塞
萬年根本是神京分工幸築沿邊壘深入宜防間道兵
見說花當窺伺久窮邊誰識近年情

飛狐倒馬紫荆連此去朝廷路一千向日北門嚴鎖鑰
於今南牧盛烽烟時名受脤當關將歲德臨分破陣年
願假精兵渡遼水莫令疲病久戈鋌

陽河西帶鎮寧流順聖川南是蔚州比歲凶荒猶在眼
向來荼毒幾曾收靈關皆出紅沙嶺直峪斜通白草溝

封殖紫荆端在此倉場芻粟可深籌

紫荆關

漢家鎖鑰惟玄塞隘地旌旗見紫荆
斥堠直通沙磧外戍樓高竝朔雲平
峰巒百轉真無路草木千盤盡作兵
誰識廟堂柔遠意戟門烟雨試春耕

春懷

春深關塞尚屯兵萬里邊防拱漢京
不爲翠華臨遠道豈應金甲廢深耕
轉輸坐見司徒急經略親看相國行

莫訝至尊忘北顧顯陵遷附聖人情

桑喬一首

喬字子木江都人嘉靖壬辰進士除戶部主事
改授監察御史駕幸承天扈從未行乞歸逮赴
詔獄廷杖謫戍九江卒戍所隆慶初贈光祿寺

少卿有詩文集

歐楨伯云子木詩清雅
俊逸有昌黎魯山之風

詩話子木按大同還一日劾四尚書嚴嵩與焉
可謂敢言矣然幾殺其身得不死者幸爾歐楨
伯撰廣陵十先生傳十先生者儲瓘靜夫王軌
戴卿景暘伯時趙鶴叔鳴朱應登升之蔣山卿

子雲曾銑子重朱曰藩子价

宗臣子相其一則子木也

流水

江流九派是潯陽山勢千重擁建康日暮雲帆看不見
夢隨江水過橫塘

包

節

三首

節字元達華亭籍嘉興人嘉靖壬辰進士除東
昌推官徵授監察御史出按湖廣抗疏劾守陵
大璫廖斌不法爲斌反誣下詔獄謫戍莊浪衛

有臺中湟中二集

莫子良云侍御詩於臺中見遂初之志焉其言麗以則於

湟中見窮愁之蘊焉其言婉以思
顧玄言云侍御詩意象都新令人炫目方之玉琢鼎彝歟

識工緻特

乏弘緯耳

詩話侍御悅研風雅以文苑英華詩可續昭明
大選體編成苑詩類選三十卷亦稱好事其所
作大約取材於是西谷張氏惜其立志太銳任
事太勇嫉惡太嚴爲讒者所中才與命妨志與
時違故所就止是
亦知己之言也

九日宴西寧城樓

九日依邊郡登高倍黯然
山風寒擁葉城日澹浮烟菊

亦窮荒見黃應故國偏何期流竄客猶接歲時筵

得侯介潭消息

消息西來未忍聞
若爲多難復離羣
投荒自分先朝露
歎逝那知對隴雲
隔歲行塵猶避馬
早春芳草已孤墳
生還儻過山陽道
長笛何堪聽夜分

贈俠少年

早隨飛將戰龍沙
日晚收營過狹斜
下馬直趨盧女肆
滿樓喧笑擁琵琶

馮汝弼 一首

汝弼字惟良平湖人嘉靖壬辰進士工科給事中
以言事謫潛山縣丞遷知太倉州調揚州府
同知不赴隆慶初追贈布政司參政有祐山集

詩話祐山入諫垣值汪尚書鉉掌吏部恃寵恣
肆言官劾之不動祐山投袂起曰擊之不勝則
其志益驕事有不可言者吾當以死爭之疏入
帝怒時禮科給事中揭陽蔡宗愷河南道御史
泰和曾翀皆廷杖死祐山與諸暨翁給事溥等
八人俱外謫然翁終以此逐斯隆慶初有追贈
之典也祐山歸田後睦鄰敦俗鄉里德之曾孫
孝廉洪業守其家法輕財博施至今東湖言好

義者必

曰馮氏

夜發天津

明月天津岸孤帆水底明
北來新鴈至彷彿自神京

徐禎

二首

禎字世兆長洲人嘉靖壬辰進士歷官廣東參政有堯山詩集

楊蘭亭奉使北上

出關稱使者知是棄繻生
鳳詔從天下樓船截海行
五

雲還入夢千里欲過征到處逢迎是無勞念去程

鄒虹橋新居

欲謝塵中鞅言從野外居短籬齊樹槿新水曲通渠俗
客無停軫幽人有報書清風北牕下高枕意何如

謝少南

二首

少南字應午上元人嘉靖壬辰進士歷官廣西
提學有粵臺橐

府江雜言

二首

蠻烟不雨似雲濃
白日陰陰慘澹中
炎氣熏人冬亦暖
不知何地候春風

落日官軍舉號齊
瑯戈畫盾障山蹊
不嫌銅斗通宵擊
却厭斑雞半嶺啼

王畿一首

畿字汝中紹興山陰人嘉靖壬辰進士官南京
武選主事有龍溪集

詩話龍溪學術
不純詩亦駁雜

登西天目

早起登山去芒屨結束牢但令雙足健不怕萬峰高

白悅一首

悅字貞夫武進人嘉靖壬辰進士除戶部主事
改禮部歷員外郎中未幾補左春坊司直謫永
平通判轉南京後軍都督府經歷稍遷南吏部
郎中再謫河間通判復轉戶部主事改尚寶司
丞有詔遷江西按察僉事俄令致仕有雒原集

皇甫子循云雒原調暢朗而思沈語婉麗而致遠音和平而易感旨雋永而難斂
顧玄言云司直以建安風骨兼貞觀思致足以振響長慶繼軌太傅矣

秦省諸君招飲愛山園亭

幽林闢瑤圃飛閣臨華池高賢敞燕會慰我遠遊思
情酣衆音翕日永杯行遲鮮飈空中來坐令炎霧披
綠竹陰雕榱雜樹緣芳畦夕照燦雲峰澄波漾漣漪
淵魚伏蒲藻鳴鳥遷樛枝歡樂良不極惜茲光景馳
慷慨君子心明明乎令儀散聚靡有常邂逅天之涯
眷言崇懿德

式彼周行詩

趙伊一首

伊字子衡平湖人嘉靖壬辰進士歷官廣西按察副使有序芳園橐

案山

沙圩塔前春草齊案山樓外曉鶯啼畫船載酒二湖遍
簫鼓聲中日又西

張謙一首

謙字仲受慈谿人嘉靖壬辰進士歷官按察副

使

東門行

步出城東門泛彼河上舟
河流東北馳念子悵悠悠
子行一何遠乃在渤海頭
白日照遼陽朔風吹高丘
王事各有程焉得斯須留
執手淚盈把杯至不能酬
垂楊夾廣衢有鳥聲相求
感之增煩惋怨彼道路修
丈夫自有懷豈若兒女儔
贈子明月珠照耀光九州
所期在同心

千載爲我述

廖希顏

三首

希顏字叔愚茶陵人嘉靖壬辰進士有東雲集

送岱宗諫議謫鎮遠

明堂再續周王禮宣室能容賈誼狂抗世有人還諫草

清時憐汝獨遐荒龍吟鎮澤千峯雨鴈度偏橋八月霜

去住天涯各何意長星猶在太微傍

自注時有星變

送李約齋戴前峰二諫議謫象郡

天風吹雨氣蕭森行盡江潭是桂林萬死投荒明主意
一封排闥小臣心城臨南斗枕榔出花暗春山瘴癘深
彈劍長歌倍憐汝許身我亦愛南金

送方兵備赴蜀兼懷楊芳洲夫子

西路元戎看仗節南宮詞賦起明經
天門初日餘殘雪江國浮雲倖使星
乘興還移浣溪櫂幾時同過草玄亭
生憎楊柳催春發故向愁邊却盡青

王璫一首

瑛字汝玉無錫人嘉靖壬辰進士官監察御史
有石沙溪上集

任丘道中寓目

萬山秋色送行鞚高樹雲生欲暮天可是河頭漁艇出
鷺鷥驚起水西田

王廷幹 二首

廷幹字維楨涇縣人嘉靖壬辰進士除行人遷
南京刑部主事歷戶部員外郎中出知九江府

有巖潭集

天壽山行宮

天旆三春發離宮四月開觀河懷禹跡問野見周才日
氣生高嶺雲陰拂翠臺太平叨扈從文雅媿鄒枚

後湖答皇甫司勳

高皇方息戰於此濬澄湖版籍封疆遠絲綸詔命敷萬
年修禹貢九譯獻周圖自得清風句南中麗景無

錢微一首

微字懋垣海鹽人嘉靖壬辰進士除行人擢禮
科給事中轉右給事中贈太常寺少卿有承啓
堂橐

贈呂東匯銀臺

黝門十載別此日意何如濟世餘三策謀身合二疏浮
踪寄天地真樂自樵漁好借盧敖杖周行五岳墟

高世彥

一首

世彥字仲修號白坪內江人嘉靖壬辰進士有

自得齋

詩話白坪軒名自得其詩意象從容五言如羣
鷗穿藻出一鳥捕魚飛月令如潮信年光似水
流白雲榭樹杪青竹露牆根瑤瑟艱爲詞牙籤
剝有書湖來沙作篆雲過石爲衣七言如對月
云佳辰若此不易得良夜何其分外明九日云
清時容我林泉嬾黃菊笑人塵務勞自娛云花
陰數酌陶元亮日課一詩梅聖俞蜀中尚楊用
修派詞多稷卨而其詩清潤如此所當洗眼觀
也

冬江


秋盡寒潭斂水痕斷雲殘雪送朝昏
深冬野鳥巢溪樹

近渚人家掩石門何處洞簫吹夜雨一竿漁火徹朝暾
蜀江氣暖春光早已有林花映小邨



明詩綜卷四十六

謹案第三十九頁前七行吉囊應作濟農花當應
作和坦皆與音韻不叶姑仍其舊後倣此不複
簽後八行巴延舊作伯顏今改



總校官庶吉士

臣

張能照

校對官檢討

臣

盧應

膳錄監生

臣

徐壇